

Ilanngussaq.nr. 1

**Uunga siunnersuummut tunngatillugu tusarniaanermut akissutininut allakkiaq: Siusinaartumik pensionisiat pillugit Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2020-imeersoq.**

Siunnersuut piffissami 2020-imi 17. apriliimiit 2020-mi 15. majiimut tusarniutigineqarpoq. Tamatuma saniatigut piffissami tamatumani siunnersuut [www.naalakkersuisut.gl](http://www.naalakkersuisut.gl) -imi tusarniaanermut nittartakkami tamanut saqqummiunneqarsimavoq.

**Aallaqqaasiut:**

Tusarniaanermi akissutigineqartut teknikkimut kiisalu oqaatsini kukkunernut amigaatinullu tunngasunik imallit sukumiinerusumik oqaaseqarfigineqaratik siunnersuummi naqqinneqarput. Siunnersuutip imarisaanut tunngatillugu tusarniaanermut akissutit oqaaseqaatillu tamakkiisumik ilanngunneqarput aamma naalakkersuisoqarfiup oqaaseqaatai naqinnernik uingasumik allatat ilanngunneqarput.

**Siunnersuut pillugu:**

Allanguutissatut siunnersuummi Siusinaartumik pensionisiat pillugit Inatsisartut inatsisaanni nr. 40, 9. december 2015-imeersumi, kingusinnerusukkullu allanngortinneqartumi, aalajangersakkat erseqqissaaffiginissaat siunertarineqarpoq, taamaalilluni Inatsisartut inatsisaat siunertaareersumut naapertuuttumik paasineqartussanngussaaq.

Siusinaartumik pensionisiat pillugit Inatsisartut inatsisaata nr. 40, 9. december 2015-imeersup allanngortinnissaa pillugu siunnersuut manna §§ 8, 9, 19 aamma 39-imi aalajangersakkat allanngortinneqarnerannik imaqarpoq.

Kapitali 3-mi aalajangersakkat siunnersuuteqartoqarneratigut avinneqassapput, taamaalilluni § 8-mi qulaajaasarnerit pillugit malittarisassat pineqassallutik § 9-milu piginnaanngorsaqqinnerit pillugit malittarisassat pineqassallutik.

§ 19-imut tunngatillugu aalajangersakkami oqaasertaliunneqartut allanngortinneqarnissaanik siunnersuut imaqarpoq, taamaalilluni siusinaartumik pensionisianik qaffasinnerpaanik tunniussigallartarneq pineqarunnaarpoq, paarlattuanilli tapit siusinaartumik pensionisiallip maannakkorpiaq aningaasarsiaasa aamma siusinaartumik pensionisialinnut tunniunneqartartut qaffasinnerpaat akornanni nikingassummut naapertuuttut tunniunneqartalissallutik.

Siunnersuut aammattaaq § 39, imm. 2-p erseqqissaavigineqarneranik imaqarpoq, taamaalilluni taamaallaat sulisinnaassuseq pillugu naliliinerit pillugit maalaarutit kisiisa Siusinaartumik pensionisiaqarnermut maalaaruteqartarfiup suliarisassagaat erseqqissumik takuneqarsinnaalerlutik. Inatsit malillugu § 39, imm. 1 malillugu kommunalbestyrelsimit

aalajangerneqartut allat Isumaginninnermi Naammagittaalliuuteqartarfimmut naammagittaalliuutigineqarsinnaanerat allanngortinneqassanngitsoq siunnersuutaavoq. Taamaaliornikkut aalajangersagaq massakkut nassuiaatinut atuuttunut aamma § 10-mi siunertarineqartumut naapertuuttunngusaaq.

**Siunnersuut ukununga tusarniaassutigalugu nassiunneqarsimavoq:**

Avannaata Kommunia, Kommune Qeqertalik, Qeqqata Kommunia, Kommuneqarfik Sermersooq, Kommune Kujalleq, Isumaginninnermi Naammagittaalliuuteqartarfik, Siusinaartumik pensionisiaqarnermut Maalaaruteqartarfik, Inuit pisinnaatitaaffii pillugit Siunnersuisoqatigiit, Inuit pisinnaatitaaffiinut Institutti, Meeqqat Illersuisuat MIO, Peqatigiiffik Kalaallit Meerartaat, MIBB (Meeqqat inuunerissut), Sorlak (Kalaallit Nunaanni meeqqanut inuusuttunullu siunnersuisoqatigiiffik), Tilioq/Inuit innarluutillit illersuisuat, INOOQAT/Kalaallit Nunaanni angajoqqaat ineriartormigut akornutilimmik meerallit peqatigiiffiat, Nunatsinni Inuit Innarluutillit Kattuffiat, ISI - Kalaallit Nunaanni tappiitsut isigiarsuttullu peqatigiiffiat, KTK (Kalaallit nunaanni tusilartut kattuffiat), Landsforeningen Autisme, Kalaallit Nunaanni immikkoortortaq, Kattuffik Utoqqaat Nipaat, Angajoqqaatigiit (Angajoqqaat ADHD-ertunik autisimeqartunillu meerallit peqatigiiffiat, Neriuffik Kattuffiat, KNIPK (Kalaallit Nunaanni Innarluutillit Piginnaanikitsut Kattuffiat), Sugisaq (Tarnikkut eqqarsartaatsikkullu napparsimasut ilaqutaasullu peqatigiiffiat), Kalaallit Røde Korsiat, Sulisitsisut, SIK (Sulisartut Kattuffiat), Aarhusimi Kalaallit Illuutaat, Odensimi Kalaallit Illuutaat, Aalborgimi Kalaallit Illuutaat aamma Københavnimi Kalaallit Illuutaat.

**Uku inatsisissatut siunnersuummut oqaaseqaateqarput:**

Tilioq, Kommuneqarfik Sermersooq, Qeqqata Kommunia, KNIPK, Inuit pisinnaatitaaffiinut Institutti, Siusinaartumik pensionisiaqarnermut maalaaruteqartarfik, Avannaata Kommunia, Kommune Kujalleq aamma Sulisitsisut.

**Uku oqaaseqaateqarsimanngillat:**

Inuit pisinnaatitaaffiinut Institutti, Avannaata Kommunia aamma Sulisitsisut.

**Tusarniaanermi akissuteqartut:**

**1. Tilioq**

Isumaginninnermut Inatsisinillu Atuutsitsinnermut Naalackersuisoqarfiup Inuit innarluutillit Illersuisuat qinnuigisimavaa uunga siunnersuummut oqaaseqaateqassagunik oqaaseqaateqaqqullugu: Siusinaartumik pensionisiat pillugit Inatsisartut inatsisaata allanngortinneqarnera pillugu Inatsisartut inatsisaat nr. xx. xx. xxx-2020-meersoq

Naalackersuisoqarfiup allannguutissatut siunnersuuteqarnera tunngavigalugu § 9, imm. 2-mut makkuninnga oqaaseqaateqassaagut.

Innuttaasup piginnaanngorsaqqinnissaata kinguartinnissaa pillugu aalajangiisoqarsimatillugu innutaasoq qanoq aningaasarsiaqarnersoq paasiuminaatsoq Tiliup maluginiarpaa. Oqaaseqatigiit tunngavigalugit innuttaasup piginnaanngorsaqqinnerup kinguartitsiffiunerani siusinaartumik pensionisianik tunineqarnissaanut qanoq periarfissaqarnersoq Tilioq nalornissuteqarpoq.

Innuttaasoq taamatut pisoqartillugu ikiorsiissutinik qanoq ittunik tunineqarsinnaatitaassanersoq erseqqissarneqassasoq Tiliup innersuussutigaa. Aamma innuttaasup piginnaanngorsaqqinnissamik kinguartitsisoqarsimatillugu aningaasatigut naammattunik inuussutissaqarsinnaanera qulakkeerneqassasoq.

*Akissut: Ilanngunneqanngilaq.*

*Piginnaanngorsaqqinnissap kinguartikkallarnera pillugu aalajangiisoqarnera peqatigitillugu siusinaartumik pensionisianut akuersissuteqarneq itigartitsisoqarneraluunniit pillugit kommune aalajangiisuussasoq inatsimmi allassimasuni nassuiaatinilu atuarneqarsinnaavoq. Innuttaasoq piffissami piginnaanngorsaqqinnissap kinguartinneqarnerani siusinaartumik pensionisianik tunineqarnissaminut periarfissaqartoq tamatuma kinguneraa. Tassunga itisiliisoqaqqinnissaa Naalackersuisoqarfiup pisariaqartissimangilaa.*

Massakkut inatsimmi atorneqartumi imaattunik naleqquttoqannginneranut naggasiutigalu Tiliup erseqqissaatigissavaa.

Maanna siusinaartumik pensionisiat pillugit inatsimmi atuuttumi **§ 15, 16 aamma 17-imi** aapparisaq ukiumut aningaasarsiarisinnaasai aallaavigalugit siusinaartumik pensionisiat annertussusaat aalajangersarneqartarput. Tamanna naleqqutinngilluinnartut isumaqarfigaarput, tassami inuit innarluutillit sulisinnaassuseqanngitsut aapparisaq aningaasarsiaanut atavallaalersinnaammata. Tamanna inuit innarluutillit pillugit isumaqatigiisummi artikel 28-mut inooqataanikkut toqqissisimanissamut pisinnaatitaaffimmik qulakkeerinnittumut naapertuutinngilaq. Aamma ernumassutigineqarsinnaavoq inuit innarluutillit siusinaartumik pensionisiat aappatik ilagalugit nuussinnaannginnissaat, taamaaliornikkummi aappaasut tamarnik aningaasaqarnikkut imminnut nammassinnaanngitsut inississammata. Tamanna inuit innarluutillit pillugit isumaqatigiisummi artikel 23-mik unioqqutitsineruvoq – ilaqutariittut inuuneqarsinnaatitaneq.

*Akissut: Ilanngunneqanngilaq.*

*Oqaaseqaatit siusinaartumik pensionisiat pillugit Inatsisartut inatsisaata allanngortinnissaanut siunnersuummut matumunnga attuumassuteqanngillat, oqaaseqaatilli inatsisip tullissaanik misissoqqinnissaanut tusaatissatut tiguneqarput.*

Maanna inatsimmi atuuttumi § 31-mi aalajangersarneqarpoq kommunalbestyrelsip siusinaartumik pensionisiaqalernissaq pillugu aalajangiinerata kingorna aatsaat qaammatip ataatsip kingorna siusinaartumik pensionisiaqarsinnaatitaaneq atuutilissasoq. Kommuniip siusinaartumik pensionisiat akuerineqarnissaannut sulianik pisariaqanngitsumik sivisuallaartumik suliarinnittarnera pillugu Tiliq arlaleriarluni saaffigineqartarsimavoq. Kommunit siusinaartumik pensionisiaqalertussat pillugit sivisuumik suliarinnittarnerat kommunit aningaasatigut siunertaqarlutik suliaqarsinnaanerata ernummatigineqarsinnaavoq. Taamaammatt Tiliup innersuussutigivaa § 31 allanngortinneqassasoq siusinaartumik pensionisiat ulloq qinnuteqarfigisaq aallartiffigalugu akuerineqartartussanngorlugit. Tamanna inuit innarluutillit pillugit isumaqatigiisummi artikel 28-mut aamma naapertuuppoq.

*Akissut: Ilanngunneqanngilaq.*

*Inatsisip tullissaanik kukkunersiornissaa tikillugu oqaaseqaatit tusaatissatut tiguneqarput.*

## **2. Kommuneqarfik Sermersooq**

Kommuneqarfik Sermersooq tusarniaanermut akissuteqarnissamut periarfissinneqarnerminut qujavoq. Pineqartoq § 39, imm. 2 oqaaseqatigiit aappaannut tunngatillugu siunnersuutigissavarput maalaaruteqarnissamut piffissaliussaq isumaginninnermi inatsisit iluanni aalajangiineranut allanut maalaaruteqarsinnaaneranut piffissaliussanut malinnissinnaalissasoq, taamaalilluni Isumaginnittoqarfiup aquneqarnera aaqjissuussaaneralu pillugit Inatsisartut peqqussutaata allanngortinnissaa pillugu Inatsisartut peqqussutaata allanngortinneqarnissaa pillugu Inatsisartut inatsisaat nr. 47, 23. november 2017-imeersoq malillugu aalajangiinerup kingorna sapaatip akunneri arfiniliussammata. Maalaaruteqarnissamut piffissaliussat assigiinngippallaartut nassaassaanerat sulianik suliarinnittartunut pisariaqanngitsumik paatsuungalersitsisarput.

*Akissut: Ilanngunneqarpoq.*

*§ 39, imm. 2-mi maalaaruteqarsinnaaneranut piffissaliussaq imatut allanngortinneqarpoq: "Aalajangiinnermiit sapaatip akunneri 6 qaangiutsinnagit maalaarut Siusinaartumik pensionisiaqarnermut maalaaruteqartarfimmut tunniunneqassaaq."*

## **3. Qeqqata Kommunianit**

Siusinaartumik pensionisiat pillugit Inatsisartut inatsisaanni allannguut qulaajaanermut piginnaanngorsaqqinnermullu nassuiaatitaqartoq erseqqissaatitaqartorlu Qeqqata Kommunianit iluarisimaarneqarpoq.

Qeqqata Kommunianit maalaaruteqarnissamut piffissaliussat § 39, imm. 2-miittut qulaajarneqarnissaannik kissaateqarpoq. Tassani maalaaruteqarnissamut piffissaliussaq sapaatit akunnerinik 4-nik sivisussuseqarpoq, sulianili allani nalinginnaasumik sapaatip akunneri 6-iullutik. Siusinaartumik pensionisiaqarnermut maalaaruteqartarfimmut

maalaaruteqarnissamut piffissaliussat sulianit allanit allaaneruppat, imaluunniit § 9, imm. 2 malillugu sapaatit akunneri 6-liussappat?

*Akissut: Ilanngunneqarpoq.*

*§ 39, imm. 2-mi maalaaruteqarnissamut piffissaliussaq imatut allanngortinneqarpoq:  
"Aalajangiinermiit sapaatip akunneri 6 qaangiutsinnagit naammagittaalliuut Siusinaartumik pensionisiaqarnermut maalaaruteqartarfimmuut tunniunneqassaaq."*

#### **4. KNIPK**

##### **“§ 1 kapitali 3 imm. 2 pag. 8**

Qinnuteqartoq sulisinnaassutsimi ilaanik suli pigisaqaqqilersinnaanersoq paasiumallugu, siusinaartumik pensionisiaqalersitsinissap isummerfiginnginnerani periarfissat suliamut attuumassuteqartut tamarmik misissorneqassapput.

KNIPK Inatsisartut inatsisaata allanngortinneranik misissuereerluni imaattunik oqaaseqaateqarniarpoq:

- 1. Siusinaartumik pensionisianik qinnuteqartoqartillugu qinnuteqartut tamarmik sulisinaassusiat misilerarneqartuaannarnikuuvoq qangalili inatsisissarlu annertunerusumik erseqqissajaataanerulluni suleriusissamut siunissami.**  
**Misilittakkallu naapertorlugit una ajornartorsiutaanerusarunarpoq suliassaq (qinnuteqaat) pisortat immikkoorlutik suliarisaramikku maannakkut.**  
**Taamaattumik inatsisartut inatsisissaanut ilanngunneqarsinnaangaluarpoq ataatsimiittitaliamik pilersitsissasut kommune**  
**Tværfaglig samarbejdsgruppe, tassanilu**  
**ilaasortaasinnaapput: Isumaginnittoqarfimmi sullissisoq,**  
**Suliffissarsiuussisarfik? Majoriaq Nakorsaq - Nakorsaqarfik**  
**Ataatsimiittitaliarlu aggersaasinnaalluni sullitaq sulilluni misileraaffigisimasaa suliffeqarfik imaluunniit sullitap suliarinerani suliassamut attuumassuteqartoq.**
- 2. Siusinaartumik pensionisiallit suli pisartagaqassanersunut naliliisarnermi ukiut marlukkaarlugit aamma tværfaglig samarbejdsgruppe naliliisartuusinnaavoq.”**

*Akissut: Ilanngunneqanngilaq.*

*Inatsisartut inatsisaata allanngortinnissaanut siunnersuummi matumani kommunini sulianik suliarinnittarnerit atorineqareersut allanngortinnissaat siunertarineqanngilaq aamma qinnuteqaatip oqartussaaffinni assigiinngitsuni suliarineqartarnissaa siunertarineqarnani.*

*Kommunini ataatsimiititaliamik pilersitsisoqarnissaa pillugu siunnersuuteqartoqarneranut tunngatillugu Naalakkersuisoqarfik Oqartussaasoqarfiit assigiinngitsunik suliallit isumaginninnermi suliasat pillugit suleqatigiinnissaannut inatsisartut peqqussutaat nr. 14, 1. november 1982-imeersumut innersuussivoq. Taamaalilluni oqartussaasoqarfiit assigiinngitsut akornanni suleqatigiinnissamik pilersitsissalluni periarfissaqareerpoq.*

3. **“KNIPK-p tusarniummut ilanngullugu siunnersuutigissavaa Siunissami pensionisiat inuup nammineq isertitai aallaavigalugit tunniunneqartarnissai. Maannakkummi aappap isertitai aallaavigineqartarmata, taamaalillutik innarluutillit sulisinnaangivissortut annertuumik ilaqutariit eqqorneqartarmata atugarilikkaminni pingaartumik arlaqartunik qitornaqarsimatillugit.”**

*Akissut: Ilanngunneqanngilaq.*

*Inatsisip tullissaanik allanngortinneqarnissaanut oqaaseqaatit tusaatissatut tiguneqarput.*

### **5. Siusinaartumik pensionisialinnut Naammagittaalliuuteqartarfik**

Atuisartoqarnermut Unammilleqatigiinnermullu Aqutsisoqarfik, Siusinaartumik pensionisiaqarnermut maalaaruteqartarfimmut allattoqarfiusoq (matuma kingorna allattoqarfik) siunnersuummut oqaaseqarsinnaanissamut qujavoq.

#### **Oqaaseqaatit nalinginnaasut:**

Tusarniaanermut atortut nassiunneqartut Siusinaartumik pensionisiaqarnermut maalaaruteqartarfiup allattoqarfiani eqqarsalersitsisimapput, tassami siusinaartumik pensionisialinnut maalaaruteqartarfimmi nalinginnaasumik allaffissornermut aamma Siusinaartumik pensionisiaqarnermut maalaaruteqartarfimmi maalaarutininik sulianik suliarinnittarnermut tunngatillugu ajornartorsiutaasut eqqarsaatigineqartariaqarmata.

Massakkummi oqaasertaliunneqartuni aalajangiinernik sorlernik Siusinaartumik pensionisiaqarnermut maalaaruteqartarfiup suliarinninnissaanut piginnaatitsiffiussanersut nalornissutigineqarsinnaapput. Siunnersuummi "siusinaartumik pensionisiaqalersinnaanermut itigartitsitsilluni imaluunniit" atorunnaarsillugu allanngortitsineq ajornartorsiutinngortumut

tassunga tamakkiisumik erseqqissaanngilaq, tassami itigartitsineq sulisinnaassutsip naliliiffiginera tunngavigalugu tunniunneqartuaannartussaammat, taamaalillunilu Siusinaartumik pensionisiaqarnermut maalaaruteqartarfimmit suliarineqartartussaalluni.

**Aalajangersakkat ataasiakkaat pillugit oqaaseqaatit:**

**§ 39, imm. 2, oqaaseqatigiinni oqaatsit uiguleriit siulliit pillugit**

Suliat sorliit Siusinaartumik pensionisiaqarnermut maalaaruteqartarfimmut maalaarutigineqarsinnaanersut erseqqissaaffiginissaat siunertaralugu aalajangersakkami oqaaseqatigiit "siusinaartumik pensionisiaqalersinnaanermut itigartitsilluni imaluunniit" peerneqarsimapput.

Taamaattoq allanngortitsisoqarnissaanut siunnersuutigineqartumi Siusinaartumik pensionisiaqarnermut maalaaruteqartarfiup aamma Isumaginninnermi Naammagittaalliuuteqartarfiup akornanni piginnaatitsissutip agguanneqarnera erseqqissaaffigineqarsimangitsoq allattoqarfik isumaqarpoq.

Taamaammat aalajangersagaq annertusisariaqartoq allattoqarfik isumaqarpoq, taamaaliornikkut piginnaatitsissutit agguataarnissaat suunersoq kiisalu maalaarutip sumi suliarineqarnissaanut kina aalajangiisussaansersoq erseqqissumik takuneqarsinnaaniassammat.

Tamatuma saniatigut aalajangersakkamut nassuiaatit massakkumut sanilliullugu itisilernerunerusariaqarput, taamaalilluni piginnaatitsissutit agguataarnissaanni suna eqqarsaataasimanersoq erseqqissumik takuneqarsinnaassammat. Tamannalu iluatsillugu qanoq ilineratigut suliap Siusinaartumik pensionisiaqarnermut maalaaruteqartarfimmit aamma Isumaginninnermi Naammagittaalliuuteqartarfimmit suliarineqartarnissaa pillugu assersuutissanik ilanngussisoqarsinnaavoq.

*Akissut: Ilanngunneqarpoq.*

*§ 39-imi immikkoortutut nutaatut ilanngunneqassaaq:*

*”Imm. 3. Siusinaartumik pensionisiaqartitsineq pillugu sulisinnaassutsip nalilerneqarneranut aamma pissutsit allat pillugit maalaarut imaqartoq, aallaaviatigut Siusinaartumik pensionisiaqarnermut maalaaruteqartarfimmit suliarineqassaaq.”*

*Siunnersuummut maalaarummi imaritinneqartut tunngavigalugit piginnaatitsissutit agguaanissaannut eqqarsaatigineqartunut erseqqissaaffiusumik nassuiaaserlugit ilaneqassapput. Siusinaartumik pensionisiaqarnermut maalaaruteqartarfiup maalaarutini apeqqutinut tamanut siusinaartumik pensionisianut tunngassutilinnut aamma maalaarummi sulisinnaassutsip naliliiffigineranut tunngasuinnaanngitsunik suliaqarnissaminut piginnaatinneqarnera erseqqissarneqarpoq.*

*Maalaarut siusinaartumik pensionisiat saniatigut, assersuutigalugu pensionisianut ineqarnermulluunniit tapiissutinut sulisinnaassutsimut maalaarummut tunngassuteqanngitsunik imaqarsimappat, tamakku naliliiffigilluareernerisigut Isumaginninnermi Naammagittaalliuuteqartarfimmiit suliarineqassapput.*

*Siusinaartumik pensionisiaqarnermut maalaaruteqartarfimmut tunngatillugu Siusinaartumik pensionisiaqarnermut maalaaruteqartarfik pillugu Namminersorlutik Oqartussat nalunaarutaanni nr. 25, 28. oktober 2016-imeersumi § 10 innersuussutigineqarpoq.*

*Siusinaartumik pensionisiat pillugit ilitsersuummi assersuutissanik itisilikkanik ilanngussisoqarsinnaassaaq.*

### **§ 39, stk. 2, oqaaseqatigiinni oqaatsit uiguleriit aappaat pillugit**

Siusinaartumik pensionisiaqarnermut maalaaruteqartarfimmut maalaarutininik tunniussinissamut piffissaliussaq maalaaruteqarnissamut piffissaliussaq isumaginninnermi inatsisinut allanut innersuussutigineqartoq assigalugu allannortittariaqaraluarpoq. Taamaalilluni maalaarut Siusinaartumik pensionisiaqarnermut maalaaruteqartarnermut aamma Isumaginninnermi Naammagittaalliuuteqartarfimmut tunniunneqartunut maalaaruteqarnissamut piffissaliussat aamma maalaaruteqarnissamut ilitsersuut assigiilissapput. Piffissaliunneqartoq maalaaruteqartarfimmut taakkununga marlunnut assigiinnissaa tamanit kissaataanerpaassagaluarpoq.

Assersuutigalugu naammagittaallionnissamut piffissaliussaq imatut allanneqarsinnaavoq: "Aalajangiinnermiit sapaatit akunneri 6 qaangiutsinnagit maalaarut Siusinaartumik pensionisiaqarnermut maalaaruteqartarfimmut tunniunneqassaaq."

Allattoqarfik taamaalilluni siunnersuummut allanik oqaaseqaatissaqanngilaq.

*Akissut: Ilangunneqarpoq.*

*§ 39, imm. 2-mi naammagittaalliuuteqarnissamut piffissaliussaq imatut allannortinneqarpoq: "Aalajangiinnermiit sapaatit akunnerisa 6 iluanni maalaarut Siusinaartumik pensionisiaqarnermut maalaaruteqartarfimmut tunniunneqassaaq."*

## **6. Kommune Kujalleq**

Kommune Kujalliup Siusinaartumik pensionisiat pillugit Inatsisartut inatsisaata allannortinnissaanut missingiut soqutiginnilluni atuaqqissaarsimavaa.

Kommune Kujalleq missingiummut imaattunik oqaaseqaatissaqarpoq:



Allanguutissatut siunnersuummi qulaajaasarnernut, piginnaangorsaqqittarnernut, najukkani pissutsit pissutigalugit tapiissutaagallartunut erseqqissaanerit aamma maalaaruteqarsinnaanermut erseqqissaanerit pineqartut kommunip maluginiarpa.

§§ 8 aamma 9-mut allanguutissatut siunnersuut tunngaviummik ajornartorsiummut qaangiinaviangitsoq kommune isumaqarpoq, taannalu inatsisip oqaasertalernerani atuuttumi uterneqartarpoq, tassalu pensionisianut qinnuteqartup piginnaangorsaqqinnissamut innersuuneqartarnera aalajangiineq aqutugalugu aalajangiineq nassuiarneqarmat.

Naalackersuisoqarfiup ingerlatsinikkut inatsisitigut taaguut paatsoorsimassagaa kommune naliliivoq, tassami aalajangiinermi inatsit malillugu innuttaasup inatsisitigut piumasaqarsinnaanera aalajangersarneqarmat.

Piginnaangorsaqqinnissamummi innersuussineq imaanngilaq pineqartup siusinaartumik pensionisianik pisinnaaneranut pisinnaanginneranulluunniit qulaajaaffigisimanissaanik naammassinniffiusimassasoq. Piginnaangorsaqqinnissamut innersuussineq tassaassaaq ingerlatsinermut inatsisini suliamik suliarinninnermut tunngatillugu aalajangiinerunngitsumik aalajangiinertut nassuiaanissaq.

*Akissut: Ilaatigut ilanngunneqarpoq.*

*Piginnaangorsaqqinnissamut innersuussineq, imaluunniit piginnaangorsaqqinnermut kinguartitsigallarneq piviusumik ingerlatsinermik suliaqarnerupput.*

*Tamanna aalajangersakkanut § 9, imm. 1-imi, aamma § 9, imm.2-mi oqaaseqaatinut ilanngunneqarpoq.*

Inatsimmi aalajangersakkamut nutaamut nassuiaatini § 9, imm. 2-mi ilaatigut imatut allassimasoqarpoq:

*" Piginnaangorsaqqinnerup kinguartikkallarnissaa pillugu aalajangiisoqarpat, paasisutissat pigineqartut tunngavigalugit siusinaartumik pensionisiaqartitsinissaq pillugu kommune aalajangiisinnaavoq."*

§ 9, imm. 2 nutaaq siusinaartumik pensionisiat akuersissutigigallarnissaannut atorneqassappat inatsisissatut siunnersuummi peqatigitillugu paragrafit allat misissorneqarsimannginnerat kommunip pissusissamisoorsorinngilaa.

Tassani inatsimmi atuuttumi oqaaseqatigiit pissusissamisoornersut pillugit apererusunnermik pilersitsivoq, tassalu; ataatsimiinnissamut aggersaanermut takkutinngitsoorneq aamma qulaajaanernut imaluunniit piginnaangorsaqqinnernut peqataanninneq pillugit

qulaajaanernut imaluunniit piginnaangorsaqqinnernut peqataanngitsoornernut oqaatsit atorneqartut nutaat paasineqarput.

Tamanna pensionisianik tunniussaqaqarallarnissamut aamma siusinaartumik pensionisianut qinnuteqaatit itigartitsissutigigallarnissaannut § 9, imm. 2-mik kommunip atuisinnaaneranik isumaqarpa?

*Akissut: Ilanngunneqanngilaq.*

*Siusinaartumik pensionisiat akuersissutigineqartut aallaaviatigut akuersissutaagallartuunngillat, kisianni Siusinaartumik pensionisiat pillugit Inatsisartut inatsisaanni § 13 malillugu siusinaartumik pensionisiat tunniunneqartut qaffasissusaat nalileeqqittoqarneratigut allanngortinneqarsinnaapput atorunnaarsinneqarsinnaallutilluunniit.*

"Tamanna aalajangiunneqassappat § 9, imm. 2 allanngortittariaqartoq kommune isumaqarpoq, allatullu ajornartumik § 9, imm. 3-mik pilersitsisoqartariassaaq, tassungalu peqatigitillugu § 13, imm. 5, § 43, imm. 1 aamma § 43, imm. 3 naleqqussarlugit."

*Akissut: Ilanngunneqarpoq.*

*§ 13, imm. 5-imut, § 43, imm. 1-imut aamma § 43, imm. 3-mut innersuussinerit § 9, imm. 2-miit § 9, imm. 3-mut allanngortinneqarput.*

"Siunnersuummi § 9, imm. 2-mut tunngatillugu siusinaartumik pensionisiat piginnaangorsaaqqinneq misileqqaarnagu akuersissutigigallarneqartarnissaat anguniarneqartoq, taamatullu pisoqartillugu suliap ukiup ataatsip ingerlanerani suliareqqinneqartarnissaa kommunip maluginiarpa.

Tamannalu pissutigalugu paasiuminaappoq tamanna qanoq ililluni kommuninut aningaasartuutigut sunniuteqarnavianngitsoq, soorlu tamanna inatsisissatut siunnersuummut nassuiaatini nalinginnaasuni immikkoortoq 3-mi nassuiarneqartoq.

Aappasanillu sunniutaasussat pillugit siunnersuummiittoq paasiuminaappoq, matumani ukiup ataatsip qaangiunneratigut nalileeqqinnermi paasinarsippat piginnaangorsaqqinnissap massakkut aallartinnissaanut tunngavissaqalersoq; siusinaartumik pensionisiat tunniukkallarneqartut kommunimit taava atorunnaarsinneqassappat?"

*Akissut: Ilanngunneqanngilaq.*

*Malittarisassanut tunngaviliunneqartut atorneqareersut allanngortinnissaat siunertarineqanngilaq, tamanna imatut paasillugu; § 9, imm. 2 massakkut § 9, imm. 1-imut*

*erseqqissaataavoq, tassani aamma inunnut sulisinnaassutsip appasinnera pissutigalugu piginnaangorsaqqinnermik ingerlatsisinnaasimannngitsunut siusinaartumik pensionisianik tunniussisoqartarsimammat. Qinnuteqartoq sulisinnaatsimut taamaalinerani atuuttumut tunngatillugu naliliiffigineqartussaassaaq.*

"Siunnersuutit taamaattut suliamik pisariaqannngitsumik suliaqarnissamik kinguneqartassasut kommune naliliivoq, tassalu pensionisianik akuersissuteqartoqariarluni, akuersissuteqarnerlu tunuartinneqarluni, tamatumalu kingorna piginnaangorsaqqinneq pereerpat akuersissuteqaqqittoqarluni. Siunnersuummi § 19 ajornartorsiummik taassuminnga aaqiissutaanaviannngitsoq nalilerneqarpoq!

§ 39, imm. 2-mi Siusinaartumik pensionisiaqarnermut maalaaruteqartarfimmut maalaaruteqarnissamut piffissaliussaq Isumaginninnermi Naammagittaalliuuteqartarfimmut naammagittaalliuuteqarnissamit allaanerusoq ingerlatiinnarneqarnera pillugu nassuiaasoqarnissaanik Kommune Kujalleq ujartuivoq."

*Akissut: Ilanngunneqarpoq.*

*§ 39, imm. 2-mi naammagittaalliuuteqarnissamut piffissaliussaq imatut allanngortinneqarpoq: "Aalajangiinnermiit sapaatit akunnerisa 6 iluanni maalaarut Siusinaartumik pensionisiaqarnermut maalaaruteqartarfimmut tunniunneqassaaq."*

"Siusinaartumik pensionisiaqarnermut maalaaruteqartarfiup katitigaanera qanoq isikkoqarnersoq kommunimit paasineqarnissaa aamma soqutigineqarpoq."

*Akissut: Ilanngunneqanngilaq.*

*Inatsisartut inatsisaanni § 11-mut innersuussisoqarpoq.*

Inatsisissatut siunnersuummi § 2, imm. 2 inatsisissatut siunnersuutip atuutilernissaanut tulluartuunngitsutut kommunimit isumaqarfigineqarpoq, tassami siusinaartumik pensionisiat pillugit nalunaarut nr. 15, 30. juni 2016-meersoq allarpassuarnut tunngassuteqarmat massakkut inatsisissatut siunnersuummi aqutsinermut tunngatillugu.

*Akissut: Ilanngunneqarpoq.*

*Allaffissornikkut najoqqutassat Siusinaartumik pensionisiat pillugit Inatsisartut inatsisaat malillugu atortussanngortinneqartut atuutiinnassapput Siusinaartumik pensionisiat pillugit Inatsisartut Inatsisaat malillugu malittarisassat aalajangersarneqartut taarserneqarnissaat atorunnaarsinneqarnissaalluunniit tikillugu.*